

PABLO NAAJIONEE GÁLATA

JIJAJINIA QUINIAA PUEYASO PUEYACUARA

Gálata pueyacuara naajionee

1 ¹¿Niaate qiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristo-juanaacuaajaari cua jiyatequiaari na jiyaramiquishano cua quiniuria. Nojuacuaajaari na Que samiitianishanohua macujiniji. ²Niya cuata quiniaa parta Pueyaso pueyataní, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuerajanaa. ³Pa Que Pueyaso, mariyata pa Jiyaniijia Jesucristoni, nojori cuaara cumaquiiria nijaniya, nioojia cajitishano nia quiniurijuhuj. ⁴Jesucristoori tama na cuaqueyajaaja panitiaquiaari pocuara na mosaanura. Naacujitij, nojuajaari pa jeequequiaari puetunu sesa pa miishanoinijijianaa. Nojuajaari naa miiquiaari sesa miiniucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujani, na muerasu pa quiniuria. ⁵Naaratej, pa Que Pueyaso cuaara maninihuaqueetasano quiiria. Cuaara naa quiiria pueyaracaanutej.

**Maja tamonu maninia rupaa quiniu socua
Jesucristo rupaajiniji**

⁶¿Taa nia miiquianuni pueyanaa?
Quiarijiani, janiyari jiyanohua tacaya

niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocuaajaari Neyanutaja nia cojiritiaquiaari paniniu, Jesucristo miiniucua maninia niaara, na panishano pueya nia quiniuria. ⁷Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuaana tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhanaj, mariyateyacato nojori quiniucua. ⁸Cua tojiri pueyanaa, tamonu pueyano jaara pocuaji Tacuna rupaa niishitiojoriquia nijaniya tamaatia canaa niishitiojosanojiniji nijaniya, Pueyasoori na saniitionutaniya. Naajuhuj, janiya jaara tamaatia pahuatare Jesucristojiniji nijaniyani, jiyocuaaanuji roseno Pueyaso serujuhuj, Pueyasojuaanaari canaa saniitionutaniya. ⁹Janiyacuaajaari naa sequeja nijaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Niaa jaara tamaatia pahuataaariquia Jesucristojiniji, maja naate taa tari cua pahuataquiaari nijaniyacujani, Pueyaso cuaara saniitiooranøj.

¹⁰¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya

timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanishaaquiaari Jesucristo jiyaramiquishano na quiniuriani

¹¹Cuarta Pueyaso pueyanaa, nia pohuatareera cante cua niishitiojoquiaari Jesucristo rupaani, cua pohuatasano nijaniyani. Pueyanaa, nio rupaa janiya na pohuataa nijaniyani, nioori maja mijiria quinaa pueya niishitiojosano janiya. ¹²Taa cua sequeya nijaniyacujani, majaari nio rupaa cua niishiniu quiquiaari tamasaca pueyajiniji. Jesucristojuanaacujaari na rupaa cua niishitiquiaari.

¹³Naa naasucuaari janiyajiniji tojinuujiacuja tarijia. Seetanujuanaa cuarta Judiocuaca miishano mijia cua quishacarijia, janiyari Pueyaso saquiriojosano pueya puecoonu panijia puetunujuanaani. Janiyari jiyanhua paracajia nojorini. ¹⁴Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. ¹⁵Naajaa, jiyanhua panijia Pueyaso quiniucua, cua supueyaquishacarijia, inojuajaquiiri tari cua saquiriojoquiaari na pueyano cua quiniuria! ¹⁶Naacujitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pohuata nura taucuaca. Neyanu na niishitiniu nuhuaji janiya, majaari quenaaja tamasaca nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocujaari maninia cua niishitiquiaari puetunujuanaa Neyanujiniji. ¹⁷Naajuhua, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacari-

tij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaarihua Damasco tiacajiniohuani.

¹⁸Jiuujianaraca marijia cua shocotejonusu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini.

¹⁹Jiyacaritij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiquiaari cutarani. Nojuacuajaari pa Jiyaniijia Jesu tarajanu. ²⁰Pueyanaa, Pueyasocujaari niishiya, janiyari nio cua naajiojinia seetanujuanaa nia pohuataani.

²¹Na nuhuaji, janiyari quiaquiaari Siria jiyajiniani, Cilicia jiyajinianio.

²²Saniniuujia, Judea jiyajinia Jesu tojitiajaca maapueeri juhanoujaaja maja na niishitiniu quijia janiya. ²³Nojoriiri saaja naa poojotasaaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacaritij, nojuajanaari quiarjia pa Jiyaniijajiniji pohuataa pueya niqiarajuhua”. ²⁴Naa nojori tojinuuushacari janiyajinijitij, nojoriiri Pueyaso maninuhuaqueetaquiaari nojori paraca na jataniniucua Jesu rupaa pohuatana na quiniuria.

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhuaj

2 ¹Catorce marijia jaara shocojoquiaari, janiyari Bernabeeta Jerusalén tiacajinia pacutequiaarihua quianuni. Janiyari jiyacari Tito ropoquiaari cucuajuhua. ²Pueyasocujaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojitiaja-

ca jiitianaa pueyata rerejoquiaarini. Maja seetanu puetunu nojoritijanaa, saaja nio pojoritia: Santiago, Pedro, Juannio. Janiyari saaja cuno pojori niquiara pohuataquiaarini taa cua pohuataquiaa Jesujiniji puetunu taucuaajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuana sesa niishitiojiya taucuaani?” Cua sequetureeri: “Maja. Quiaacuaja seetanu rupaajanaa niishitiojiya taucuaa, naa Jesucristojiniji quia pohuatasacari nojori”.³ Naajuhua, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiitianaata, nojoriiri Tito niquiquiaari nareja, nojori na rupenurajuhua. Nojoriiri niishiquiaari nojuajaari seetanujuanaa Pueyaso pueyanojuhua, saaja Jesucristoocua na tiuuniucua.⁴ Saniniuujia, noojiaqueya canaa Judiocuacajinijinioori tama nojori cuaqueyajaaja jiyatequiaari juhua Jesu tojjijaca pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucuaaanu Moisés Rootasano tojjijaca canaa quiniuhua.⁵ Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojinu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia

tiuuniucua. Majaari canaa cojitiniu paniniu quiquiaari Jesucristo rupa, tariucuaaanu niishitiojosanota.

⁶Cuno pojori Pueyaso pueya maapue jiitianaa Jerusalén tiacajiniani, nojoriiri jiyanohua tojishano pueya quijia. Janiyara naajaa. Pueyasocuajaari najuhuana quijiaa jiyanooquiaajuhua, taa na jiyanooquiaa tojishano pueyacuaani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari quenaaja niquiryatu rupaa nojori sequenu quiquiaari, nojori niishitiojonura janiya socua.⁷ Nojori cutaraari niishiquiaari Pueyasocuajaari seetanujuanaa cua jiyatequiaari na rupaa pohuatana cua quiniuria taucuaara, taa Pedro na jiyatequiaari Judiocuaca niquiara pohuatana na quiniuracuaani.⁸ Pedro Jiyatena Judiocuaca niquiara Jesucristojiniji pohuatariquianoni, cuno Pueyasojuanaacuajaari cua jiyatequiaari juuhua taucuaa niquiara pohuatana na quiniuria. Naacuajitij, canaari mariyata Pueyaso jiyaramiquishano pueyani.

⁹Santiago, Pedro, Juannio, nojoriiri socua tojishano quijia puetunu Jesuucua tiuunaa cuarta Judiocuacajinijinojuanaa. Nojoriiri seetanujuanaa puetunu Pueyaso muerasu jiyaniijianucuaajanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanooquiaari, na jiyatenua janiya Neyanujiniji pohuatana cua quiniuria taucuaa niquiara. Naaratej, nojoriiri na juaashiquia niquitiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaariijaariuhua: “Maniniacuaja. Nia quiojiyare taucuaacua tii nia pohuatunura Jesujiniji nojoriijuuhua. Canaari saniniuujia parta Judiocuaca tajinia poonijionutaniyanijia, nojori niquiara canaa pohuatunura

Jesujiniijihuhaj”. ¹⁰Nojoriiri canaa sequequiaarijihuhaj: “Canaa panishano pueyanaa, majaari nia niyajetanu casamiiuniucua pueya naacunu”. Naaratej cuarta Pueyaso pueyanaa, puetunu tiqiyocujanaa cua rucuanesacari, janiyari naa miiquiaa seetanujuaanaani.

**Antioquiya tiacajinia Pedro
nacasusaanujiniji pohuatasano**

¹¹Tamacari, canaa quishacari Antioquiya tiacajinia, Pedroori canacuca niqiaarijihuhaj, canaata na quiniuria tii. Tii na quishacari canaata, Pedroori sesa miiquiaari cua niqiuara. Cunora, janiyari jiyanohua na nacasuquiaarini. Cuno na miishanoni, cunoori seetanujuaanaa sesa quiquiaari Pueyasora. Naa na miishacari-tij, tamajaaja miiriquiaa cocuaatiari. ¹²Pedroori naa miiquiaariti. Coteenu canaa cojiqiaari maniniaari tariucua Jesuucua tiuujiaca taucacuata, canaata na miaquejonura jatiqii. Jiyacaritij, canacuca tiuquijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaca taucacuata. Narta Judiocuaca puerequiaariiri maja na sequesaaanura: “Cunoqui sacuaaraatia miaquejojua taucacuata”. ¹³Tii quinia Jesuucua tiuujiaca Judiocuaca jaara niqiquiaari naa Pedro miishanocuaatej, nojoriiri jaarajaaja canacuaji rupatequiaarijihuhaj, Pedro na cojitiuniuria. Naajuhaj, iBernabeeri jaarajaaja canacuaji rupatequiaarijihuhaj cuno mosanucua na cojiniuria! ¹⁴Naaratej, janiya jaara naa nojori niqiquiaari tariucua Jesuucua tiuunio taucacuca tamacatiuyanoni, janiyari niishiquiini, cuno pojoriiri maja

maninia na miitiuniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niqiarajanaa naa sequequiaari Pedroni: “Quiaari Judio pueyano. Naajaa, majaari seetanujuaanaa juhua Judio pueyano quia quiniu quiquiaa. Quiarjia saniniuuja, quiaari Jesuucua tiuunio taucacuca shiniujiya nojori quiniuria seetanujuaanaa juhua Judiocuaca, nojori rupenura pajaniya. ¿Casaara naa quia shiniujiya nojoriirini? ¹⁵Paacuajaari Moisés Rootasano tojjijaca cutarani, Judiocuaca pa quiniucua. Paari maja tahuani, Pueyaso tojiyashijia. ¹⁶Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjijaca pa quiniucua. Maja. Pueyaso cutaraari pa jiyanoojia, Neyanu Jesucristoocua pa tiushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijianaa. Sesa pa miishanoori maja na jiyanooshaanu quiquiaa Moisés Rootasano pa tojishacari. Maja. Naajuhaj, majaari quenaaja niquiriyatu pueyano jiyanooshaanu quiniutianiya Moisés Rootasano tojjijia na quiniucua. Maja.

¹⁷Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojjijaca pa quiniuria. Na nuhuaji, paa jaara jiyaniyani paa sesa miijica quiriohuani Moisés Rootasano pa tojiyaquishacari tarini, saaja Jesucristoocua pa tiushacari, paari jiyanohua jiyajenyani. Naa pa jiyanishacari, paari juhua sequeyani Cristoori pa jiyaterohua sesa miijica pa quiniuhara nocua pa tiuuniucua. ¿Quiaateeri naa sequenu paniya Pedronaa? ¡Maja!

¹⁸Paacuajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo

rupaacua pa tiuushacari. ¿Paateeri socua maninia miijiaa quiniutianiya Pueyaso niqiarani, paa jaara Moisés Rootasano tojjijiaa quiriouhani? ¡Maja! Paa jaara naa niishiriojiyani, paari jianohua jiyajeneyani. Paacuaajaari seetanujuanaa pohuatunuquiaa puetunu pueya niqiara-janaani, nojoriiri jiyanooshaanutaniya saaja Jesuucua nojori tiuushacari. Naa pa pohuatunuusano jaara sapojosano quiriquia, paa maara jyanohua sesa miijiaa quiriquiani. Saniniuujia, Pueyaso cutaraari seetanujuanaa pa jyanooquiaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niqiarajanaa. ¹⁹Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucujaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojjiaa cua quiniuria socua. Naacuajitij, janiyari quiarijia saaja Pueyasora quiya cutarani. Janiyara, janiyari tari cojiritiasaaquiaari monu Cristota niyacutesanojiniani. ²⁰Naacuajitij, quiarijiani, majaari nio janiya quiyani. Jesucristocuaajaari nio, coojiajini quiyani. Majaari tamajaaja saminio cua quiniu. Jesucristo cua rupesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. ²¹Majaari cua ruuretanu Pueyaso jyanoo-niu panishacari janiya. Jaara pa naata quiriquiaa tama pa cuaqueyajaaja jyanootiniu Pueyaso, Moisés Rootasano tojjijiaa pa quiniuucua, Jesucristo maara najuhua-na cusoquiaari pocuara.

¿Teyano tojjiaa pa quishacari pa jiyanooshaaquiaani, Moisés Rootasano, Jesucristoocua tiuuniu soj?

3 ¹Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niqiara pohuataquiaari Jesucristojinijitij, canaacuaajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaariuhuj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jyanootiniutianiya Pueyaso? Maja nia naata pueyanaa. ²Quiarijiani pueyanaa, janiya saaja nio nia nequesotanu paniyani. Cua riuacature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. ³¡Niaaquiiri tojetaarucujajanaa mosanucujuhuanajaj! Nia niquishuriiraj, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jyanootiniu tama nia cuaqueyajaaja Moisés Rootasano nia tojishacariuhua juucua, tama nia cumaacatajaaja? ¡Maja! ⁴Pueyasocuaajaari jyanohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhua quiquiaarijuhuaj? ⁵Pueyanaa, Pueyaso jaara na Sohuanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini?

¿Pueyasoteeri naa maninia miiquiaa nijaniyatej, Moisés Rootasano tojjiaa nia quiniuucua? Maja. Nojuajaari naa maninia miiquiaa nijaniyatej, saaja na rupaacua tiuujiaa nia quiniuucua, canaa pohuatasano nijaniyani.

⁶¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaariiri saaja nocua na tiuuniuucua. ⁷Naacuajitij pueyanaa, quiarijia nia niishiri cutara, cante Pueyasooocua tiuujiani taa supueta-na Abraham tiuquiaaricuaani, nojoriiri seetanujanaa canaa supuetana Abraham niquiohuajanaa cutara. ⁸Pueyaso jaara na sequenu panishano naajiotaniquiaari tariucuaaanu, nojuajaari tari niishiquiaari taa taucuaa na jiyanooniutianiyajaaniuhuj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujajinio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajini-jiniojuanaa nocua tiuuriquiano pueyatej”. ⁹Naaratej, cante Jesucristoocua tiuujiani, Pueyasoori na jiyanooniutianiyajuhuj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristoocua tiuujiaa, taa na miiquiaari Abrahamcuani.

¹⁰Saniniuujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuaaanu Pueyaso Rupaajinia:

“Moisés Rootasano tojjia cuaara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

¹¹Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniuucua”.

¹²Saniniuujia, Moisés Rootasanoi, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojiniuucua rishiniutianiya”.

¹³Maja maninia pa tojiyaquiniuucua Moisés Rootasano, paari Pueyaso puecosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuaaanu Pueyaso Rupaa:

“Pueyaso sesacasanoori cuno, niyacutesanojinia teetasanoi”.

¹⁴Naa Jesucristo cusonuucua pocuaratej, saaja nocua nia tiuushacari, Pueyasoori na naata shuqiritini niajaniya taucucajuhuj, puetunu na sequesanojutajanaa canaa supuetana Abraham. Naajuhuj, saaja pa tiuuniuucua Jesuucua, puetunu pajaniyajanaari Pueyaso Sohuanu masequiaani, taa seetanujanaa Pueyaso sequequiaari tariucuaaanucujani.

Moisés Rootasanoori maja na naata Pueyaso sequesano Abraham jataniniu

¹⁵Cuarta Pueyaso pueyanaa, maatia nia pohuatareera maninia nia niishiniuria

cua pohuatasano. Cua tojiri. Pueyano jaara maninia miiniu paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriqiuano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujinio superiquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujinio supueno pueyara”. Maatia sequeyacuajaari: “Abraham jinianuucujinio supueno pueyanora”. Niquireiyatu pueyano sequeyari, maja queraatia. Nojuajaari pa Jiyaniijia Cristocuja. ¹⁷Cunora pueyanaa, janiyari seetanujuaana nia sequeyacuajani, Pueyasoori seetanujuaana sequequiaari Abraham taa nera na miiniutianiyani. Seetanujuaana Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jatanijuuhuj. Seetanujuaana Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niqutioquiaari na rootasano, saajianeeaacua na quejasano. Moisésri saniniuuja pueya na niishitioquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhua na quiniuria pajaniyara. ¹⁸Pueyaso niqutionu panishano pajaniya jaara pa niqutiosaariquia saaja pa tojiniucua Moisés Rootasano, na niqutiosocoriqiuano pajaniya maara

nareja niqutiosoo quiri. Saniniuuja, Pueyasocuajaari seetanujuanaa naa Abraham sequequiaari:

“Janiyari nareja quia niqutionutaniya cua sequesanooni”.

¹⁹Niaa naasucuaari sequeya: “Jaara naa quiriritij, ¿casaarano socuateeri Moisés Rootasano?” Nia sequeereera pueyanaa. Jiyanohua Abraham nuhuaji, Pueyasoori Moisés caminiujuutiquiaari na rootasano, pueya niishinuria nojoriiri seetanujuaana Pueyaso tojiyashijiaca. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujinio supueno pueyano cuaara tiuquiquiaarijiaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocuja. Naacuajitij, Jesucristocujaari Pueyaso jiyaniquishano quiquiaari, na sequesacari Abraham, “quia jinianuucujinio superiquiano pueyano”. Cristocujaari puetunu Pueyaso sequesano Abrahamjanaa masequiaari pajaniyarajuhuj, taa Pueyasojuanaa sequequiaari Abrahamcuajani. Saniniuuja, Moisésri saaja pueya niishitiojoquiaari Pueyaso seya caminiujiushano nojuaja. ²⁰Abrahamra saniniuuja, majaari quenaaja tamonu pueyano quiniu quiquiaari nera na caminiujiuriquiano. Pueyasojuaanaacujaari nocua muetaquiaari, na sequenura seetanujuaana taa Neyanuucua tiuujiaca na miiniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriqiuano Moisés Rootasanojiniji.

Casaaranote Moisés Rootasano

²¹Naa cua sequesacaritij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanooniniu

pajaniya, paa maara Moisés Rootasano tojtijajaca quiriqiuani, Pueyaso jiyanooniuria pajaniya. ²²Saniniuujia, tariucuacaanu Pueyaso Rupaajinjini, paari niishiyani puetunu pueyapuejanaanari Sesaaca pueya. Naaratej, majaari pa naata tarinitianu quiquiaari sesa miiniu. Naacujitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

²³Pa niishiyaquishacarijia Jesucristoocua pa tiuuniuria, paari juhua Moisés Rootasano jiitiasano pueya quijiani. Paari naa quijia taraatia pueyacuani, paa jaara tojiquiaari Jesucristojinjiaatijia, nocua pa tiuuniuria. ²⁴Naacujitij, Moisés Rootasanoori juhua pa jiitiana quiquiaari. Juhua naatujooriniyojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojuaari. Naacujitij, paa jaara Jesuucua tiuquiarini, paari puetunu sesa pa miishanojinijianaa jiyanooshaa-quiaarini. ²⁵Naa Jesuucua tiuujia pueya pa quishacari qaririjiatej, majaari socua pa tojinu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia. ²⁶Quiarijia cutara, puetunu niajanijajanaanari Pueyaso pueya, Jesuucua nia tiuuniuucua. ²⁷Naacujiti pueyanaa, niaa jaara moojinia tiuquinishaacanu, seetanujanaa nioojiata nia tiushacari Jesuucua, niaari na coquetesaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyojua nia quiniuucujuhua. ²⁸Naa Pueyaso muerasu pa quiniuucuatej, majaari Pueyaso niqiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijihua, naajaa. Poonijotesano

pueyano maaraja, camarnuujia pueyano, cunoori maja rimiajata Pueyasora. Naajuhua, caya, maaji, cunoori maja rimiajata Pueyasora. Jesucristoocua tiuujia pa quishacari, Pueyasora, puetunu pajaniyajaanari juhua niqiriyaatu pueyanoni. ²⁹Naajuhua, niaa jaara seetanujanaa Jesucristo pueya quiri, niaari seetanujanaa canaa supuetana Abraham jihuacuajinio supueno pueya cutara. Naacujitij, niaari Pueyaso sequesano Abrahamrano maseriquianojuhuaj.

4 ¹Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanajuaja maja na naata na que casami jiitianu. Nojuajaari saaja juhua pataaco seru, naatujua na quishacarijia. ²Naacujitij, tamasaacari cunomey canashitijia, cuaara mashajara quirijiaatijia, jiyaniijia jiyatesocoriquiana, taa na shipininio sequequiaaricujani. Juhucarijia niishitiojoshijajahuaj, maninia na jiitianura nerano na que riuriotaca. ³Paari naajuhua. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojtishaaquiaarini, pa supuetanaa niishishanonio. Paari naa taraatia jiitiasaaquiaarini. ⁴Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijinjijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵Naacujitij, nojuajaari na naata Moisés Rootasano tojijiaa jiyanooni, maja socua pa tojtishaanura Moisés Rootasano. Naaratej, Pueyasoori na naata pa jiyatenu na muerasu pa

quiniuria cutara. ⁶Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacaritij, nojuajaari Pueyaso pa sequetequiaa, “cua Quenaa”. ⁷Naacujitij pueyanaa, majaari tari nia quiniu Moisés Rootasano tojjijaca, juhua pataaco seru. Niaacuajaari seetanujuanaa Pueyaso niquiohua cutara. Naa na muerasu nia quishacaritij, niaari tariucuacaanu Pueyaso sequesano Abrahamrano maseriquianojuhuaj, taa na muerasurano niquitionu na sequequiaari-cujani.

**Pablo tacaashacari Galacia jiyajinia
quiniaa Pueyaso pueyacua**

⁸Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojjijaca quiquiaari taraatia. Cuno casaari maja seetanujuanaa Pueyaso. ⁹Quiarjia saniniuujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacaritij, ¿casaara najuhuana supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu nijaniya. Niaari najuhuana na tojjijaca quiniutianiya. ¹⁰Niaanaari puetunu juucajanaa niishijaca quiya, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijijarajanaa. ¿Casaara naa miijiacara nia quiriohuacuaarini cuarta Pueyaso pueyanaa? ¹¹Naa nia miiniuucuatej, janiyari jiyanohua tacaya quiarjia niaacuani. Janiyari tama sequequiaajaa-

cujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

¹²Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiacua nia quishacari, janiyari na tarinitiaquiaari tojiniiuni, juhua nijaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiitiaquiaari niaata cua quishacari.

¹³Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niquiarani. ¹⁴Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaraatia cusosu cua quishacaritij. Majaari quenaaja nia soonu quiquiaari janiya. Saniniuujia, niaari cua tojtiaquiaari juhua Pueyaso serujuanaa, nia niquiara cua pohuatasacari Jesucristojiniji. Niaa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua nijaniya. ¹⁵Quiarjiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurrini, taa nia quiquiaari coteenucujani? Janiyacuajaari niishiquiaarini, jiyanohua nia paniniuucua janiya, jaara nia naata quiquiaari, niaa maara nia namijia samiriootaquiaari nia niquitiosocoriquiano janiya, cucua nia taraajesacari. ¹⁶Quiarjia naa cua sequesacari seetanujuanaa nijaniyatej, ¿niaateeri cunora cua niquiniutianiya juhua nia paraca? ¹⁷Cuno pueya, najuhuana tamaatia nia niishitioquiaa Pueyaso rupaani, quiarjia nojoriiri maninia miiquiaa nijaniya na sapojonuta. Nojoriiri nia shuquiritiya, nojoriicua

nia tiuuniuria. Nojoriiri naa miya, canaa nia cartenura, saniniuujia nojori tojijiaca nia quiniuria. Naacujitij, majaari tari cua rootasano tojitiajaca nia quiniu quiniutianiya. Niaari cua cartenutaniyajujuhuaj. ¹⁸Quiarijiani, cuno pojoriiri nia shuquirityacuaja. Majaari nia jiyaniniu janiya nia sequeyani, maja maninia parta pueya pa shuqiritiniuria. Taaquiriirinij, maniniacuajaari parta pueya pa shuqiritiniuria, seetanujuanaa pa naacunura nojori. Niaacuajaari niishiya pueyanaa, janiyari jiyanhua nia tojishano pueyano quiquiaarini, Jesucristojiniji cua pohuatanucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹Quiquihuaniyojuanaa, jiyanhua cua tacaashacari niaacua, coojaari jiyanhua noonu pacuterohuacuhua, naatej, taa maaji nooquiaacuaa na manajani, quera na ranu panishacari. Naajuhua, janiyari naa pueyaracaanu mijionutaniya naquiya niaacuani, niaa cuara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari niojiacajinia, juhua nojuaja nia quiniuria. ²⁰¡Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuacaanu nijaniyajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

**Miriqui pohuatasano Agarjiniji,
Saarajinijinio**

²¹Moisés Rootasano tojitiajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani?

²²Moisés Rootasanocujaari Abrahamjini-

ji sequeya, nojuajaari caapiqui niyanuraca quiquiaari, caapiqui nucuaacuajiniojuhuaj. Abrahamri neco seru muetutequiaari. Na sesojoquiaari Ismael*. Na nuhuaji, saniya necojuanaari nera muetuquiaarijuhuaj. Na sesojoquiaari Isaac*. ²³Pueyanaa, Agar* jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuujia, saniya necocuajanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaari: “Abrahamnaa, quiaari niyanuraca quiniutianiya”. Naa Pueyaso sequenucuatej, necocua Saaraari* muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarr miriqui juhua Moisés Rootasano, Siná* tuhuananujinia Pueyaso niishitiojosano Moisés. Naaratej, Moisés Rootasano tojitiajacaari juhua seya quiquiaa, taa Agar quiquiaari serucuaani. ²⁵Seetanujuanaari, Agarr miriqui juhua Siná tuhuananu Arabia jiyajinia. Saniniuujia, nio pa quishacari, Jerusalén tiacaari juhua Siná tuhuananu, cuno tiacajinia quiniaa pueya quiniuucua Moisés Rootasano tojjiaca. Cunora, Moisés Rootasanoori juhua nojori jiiitiana quiya, juhua poonijioesano seya nojori quiniuria. ²⁶Saniniuujia, quiarinio Jerusalén tiacani, jiyocuaaanu Pueyaso racatasano pa quiquioranoni, cunoori seetanujuanaa Pueyaso muerasurano

cutara. Cunoori maja Moisés Rootasano tojjiacara. Cuno tiacaari miriqui juhua Saara. Paacuaajaari juhua Saara niquiohua cutarani. Majaari tari pa quiniu seru niquiohua. ²⁷Tariucuacaanu Pueyaso sequesanoajaari naa naajiotasano quiyajuhaaj:

“Niyajaru maajiniaa, shuquiriaatia quia quiri. Quiaacuaajaari mueya noonu saniyashijia. Naajaa, majaa-ri quia taraajenu. Quia shuquiriniutia quia jaaquequejore cutara. Quiaacuaajaari cartesaa-quiaari niyajaru quia quiniuucua. Naajaa, quiaacuaajaari socua queraatia niquiohuaraca quiriquia-cuno cuno niyacaraca maajijiniji”.

²⁸Cuarta Pueyaso pueyanaa, paacuaajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniani, naacuajiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiushacari, Pueyasoori na cumaacata pa jataniquiaari seetanujuanaa na muerasu pa quiniuria. ²⁹Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocujanaa jaara nera muetuquiaari, cunoori Pueyaso Sohuanu cumaacata rasaquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarijiaari naajuhuj, Pueyaso ruureta-jaca pueyari Pueyaso Sohuanu jatanishano pueya miitiaquiaa. ³⁰Quiar-ijia nia niishiri cutara, naa naajiotasaaquiaaricuaajaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar niyanurano. Cunoori

seetanujuanaa quia niquiocua muetusanorano, cua Sohuanu cumaacata rasano mueyaranotu-huaj”.

³¹Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

Saaja Jesucristoocua tiuujiaa pa quiri

5 ¹Jesucristo cusonuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojjiaca pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjiacara nia quiniuhua. ¿Moisés Rootasano tojjiaca-teeri jiyanooshaanutaniya? ¡Maja! Maja pa naata tama pa cuaqueyajaaja jiyanoo-tiniu Pueyaso, Moisés Rootasano pa tojiniucua. ²Cua tojitiare pueyanaa. Janiyari Pablóni. Janiyajanaari seetanujanaa nia sequeyani, niaacuaajaari Jesucristoocua tiuujiaa, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishiriojia, niari Jesucristo cusonu jiyatenutaniya najuhuaana na quiniuria nijaniyara. ¡Pueyanaa, majaari nia tojiniu cuno Judiocuaca, canapuate nia shiniujuquiaa nia cararaatiuuquia co miatejosaanuracuajani, seetanujuanaa Pueyaso pueya nia quiniuria! ³Janiyari socua sequenu paniya noo pojoririani, cararaatiuuquia co miatejonuuacatej, nojori jiyaniiniucua naa nojori miishac-ritij, nojori cutaraari seetanujuanaa Pueyaso muerasu. Cante naa miijiani, nojuaja cuara tojiiria puetunu Moisés

Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojinu, Pueyaso jiyanooniuria nijaniya? ¡Maja! ⁴Naa tama nia cuaqueyajaaja nia jiyanooniniu panishacari Pueyasotej, Moisés Rootasano nia tojinuucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. ⁵Pajaniya saniniuujia, paari Pueyaso Sohuanuraca cutarani, Jesucristoocua pa tiuuniuucua. Naacuajitij, paari niishiyani paari tojetaarucujanaa sesa miyshijiacara jiyatesaanutaniyani. ⁶Quiarijiani, Jesucristo rupuesano pa quishacari nocua pa tiuuniuucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiaa pa quiniuria, parta pueya pa paniniurijahuaj.

⁷Cuarta Pueyaso pueyanaa, niaacuajaruha Jesuucua tiuujiaca quijia seetanujuanaa. ¿Quiarijiaariuhua, cante nia tarinitiriohuacuaa seetanu rupaacujanaa nia tiuyaquiniuriani? ⁸Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹Cunora, seetanujua-naari nio sequesano: “Shiitianiyojua jereca mashaca jaara shoqueca mashacajinia shuushaare, cuno shiitianiyojuaari puetunu cuno mashacajanaa jereteja”. Naajaariuhua, shiitianiyojua sesa niishitiojosanoori puetunujuanaa pa sesojuajuhua. ¹⁰Naajaa, janiyacuaajaari pa Jiyaniijaacua tiuya seetanujuanaani, majaari nia tojinu quiniutianiya tamaatia cuno pojori niishitiojosano. Saniniuujia, Pueyasoori noo pojori saniitioriquiano, tamaatia na niishitiojonusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano,

tama janiyajaaja soj, naajaa, nojoriiri saniitiosariquiano.

¹¹Cuarta Pueyaso pueyanaa, majaari cua niishitiojonu quiquiaa taucuaacajinijinio Jesucristoocua tiuujiaca, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuujia, Jesucristo cusonuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jiyanoocua nia juaaquiaani. ¹²Majaari nojori nia tojinu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

¹³Cuarta Pueyaso pueyanaa, Pueyaso-cuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijiotosano pueya, taa nia quiquiaari-cuaani Moisés Rootasano nia tojishacari pueyaracaanu. Naa Moisés Rootasano tojijiaa nia quiaquishacari taritij, naajaa, majaari nia jyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari narta Pueyaso pueyeta nia cumaquitiojonura, seetanujuanaa nia panitioonuta. ¹⁴Niaa jaara naa miijiaca quiriquiatej, niaari puetunu Moisés Rootasanojuanaa tojiyacuaaja, taa na rootasanojinia naajiotasano quiyacuajani. Naa sequeyari:

“Panijia quia quiriquia, taa quia paniyacuaa tama quia cuaqueyajaajani”.

¹⁵Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu, naatej, taa sareya

sayonuujutaquiaacuaani. Niaa jaara naa quiriquiatej, niaari socua puecotoonutaniyaquij.

Taa quijiate tama na panishanojuaja miiija pueyanoni, Pueyaso Sohanu tojjia pueyanonio

¹⁶Janiya nia sequeya cutarani pueyanaa. Cua tojiri. Pueyaso Sohanu tojjia nia quiri pueyaracaanu. Naacujitij, majaari sacuaratia tama nia panishanojuaja nia miiniu quiniutianiya. ¹⁷Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohanu paraca. Naajuhuj, Pueyaso Sohanuuri poojiajinia sesa casaa pa panishano paracajuhuj. Naacujitij, cuno pojori miaquetoojosacari poojiajinia, cunora, majaari pa naata miiniu taa pa miiniu panyacuajani. ¹⁸Saniniuujia, Pueyaso Sohanu jaara nia cumaquiuaacuaaja saaja Pueyaso nia tojniuria maninia, cunora, Moisés Rootasanoori tojniu panyaquishaanutaniya tari. Naacujitij, niaacuajaari maninia miiniutianiya saa Pueyaso Sohanutaja.

¹⁹Maatia niquishanocuaajaari taa pueya miiquiaani, noo pojori, canapuate tama na panishanojuaja miijiacani. Nojoriiri juhuajaniya na camishoo maajipohua numuetucunuujuaa, sacuaratia miitioojua narta canuutajaariuhuj. Maajipohuari naa sacuaratia miitioojua narta maajipohuatajuhuaj. Pueyari saaja naa miiniucua jiaatijaca sacuaratiatej. ²⁰Naajuhuj, nojoriiri tama nojori pueyasorajaaja nojori shipinishano casaa secojonuujuaca. Nojoriiri shimiacurijuhuj, narta pueyano shimiojonuujuaca. Narta pueyano niquiniu panyashijiajaariuhuj. Nojoriiri juaatioojuacajuhuj. Nojoriiri narta pueyano jiiitiasanocua jiaatijacajuhuj. Cunora, nojori niquiniu panyaquijiaari. Nojoriiri maja na

niishiniu rejetenu na juaaquiaca. Ritia juaajiacaari. Pueya nasojojua narta pueyanooouarajaariuhuj. Naacujitij, nojoriiri narta pueya raquiriojotaquia narta pueyajiniji. Nojoriiri saaja tama nojori panishano pueyajaaja panijiaa, canapuate maninia miiquiaa nojoricuajani. ²¹Cuno pojori, naa sacuaratia miijiaca pueyaracaanu Pueyaso niquiariani, nojoriiri maja na niquiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaratia mashaasequenuujacajuhuj. Nojori mashaasequenuusacari, puetunu sacuaratia casaa miijoquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Nijaniya saniniuujia cuarta Pueyaso pueyanaa, cua tojiri. Cante naa sacuaratia casaa miijojuani, nojuajaari maja Pueyaso jiiitiasano na quiniu quiniutianiya, pueyaracaanu rishijia na quiniuria shuquiriaatia.

²²Saniniuujia, paa jaara Pueyaso Sohanu shanacure poojiajinia na poonijionurani, nojuajaari parta pueya panijia pa jiyateja. Poojia jiyateya shuquiriaatia quijiaari. Poojia cajitijiajaariuhuj. Jacaria pocujara pa jiyateyajaariuhuj, juhuajaniya sashijiano. Pueyaso Sohanuuri maninia pueyanora pa jiyatequiaa, jiyanoojiano. Pa sequesano miijiara pa jiyatejajaariuhuj, pueya tiuuniuria pocua. ²³Pueyaso Sohanuuri pa jiyateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaja pa rejetenu. Paa jaara naa miijiaca quiriquia Pueyaso Sohanu cumaacatani, majaari quenaaja niquiriyaatu Moisés Rootasanojinijinio sesacanu quiniutianiya pajaniya. ²⁴Seetanujuanaari, paa jaara Jesucristo pueyanora

quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. ²⁵Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuanaa pueyaracaanu na tojjijia nia quiri cutara. ²⁶Majaari tama pa cuaqueyajaaja pa jiyaniiniu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutiani-yani. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuj, tamonu jaara socua maninia miishaare pajaniyajiniji. Majaari naa miijiaca nia quiniu Pueyaso pueyanaa. Saaja maninia quijiaca pa quiri cutara.

**Niarta Pueyaso pueyata nia
cumaquitioojoriquia**

6 ¹Cuarta Pueyaso pueyanaa, nia jaara parta Pueyaso pueyano niquiriquia sesa miyano, jacaria nia nacasure. Cuno nijaniyajinijinio canapuate Pueyaso Sohuanu niishitajaraca cutarani, nojori cuaara jacaria na nacasuuranj, sesa miiniu na tarinitianuhuara. Cante cuno sesa miijia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuj, jiyanhua nia cojuare tama nia cuaqueyajaaja Sesaaca mariqui nia saniniujiurijiaariuhuj, sesa nia miiniurijuhuj. ²Maninia cutaraari nia cumaquitioonura niarta Pueyaso pueyata, nia jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutani-yani.

³Najuhuaana quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojo-

juaari tama na cuaqueya sapojiyajaacujua. ⁴Puetunu nijaniyajanaa cumaati tama niishiriojoquiaajaacujua, taamueca pueyanote nijaniyani, maninia miijia, sesa miijia soj. Niaa jaara seetanujuanaa maninia miijiaca quiriquia, tama maninia nia miishanojuaja nia timitiare. Niarta Pueyaso pueyano jaara socua maninia miijia quiri nijaniyajiniji, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujiuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵Puetunu pajaniyajanaari tamaatia poonijiosano jiiitiaani. Tama nijaniyajajaaja cumaati na miiquiaa maninia, Pueyaso shuqiritianura nijaniya, seetanujuanaa shuquiriaatia nia quiniuria.

⁶Canapuate Pueyaso rupaa niishitiojosaaquiaani, cuno pojori cuaara na niishitiojanaa niqitiojooara nojori casamijiniji saniniujjia, nojori niishitiojanaa jiiitianura nojori panishanojuhuaj.

⁷Pueyanaa, maja tama nia cuaqueyajaaja nia sapojonu nia jyanishacari niaari saniitioyaquishaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutanijajaaniuhuj”. Nio miriqui sequesanoori nio niishitiojiya: cante maninia miijiani, nojuajaari maninia miishaanutaniyajaacuhuj. Naajuhuj, cante sesa miijiani, nojuajaari sesa miishaanutaniyajaacuhuj sesa na miiniucua. Cunoori maja rimiajata.

⁸Naacuajitij, canapuate tama na cuaqueyajaaja shuqiritijiaa sacuraatia casaa na miishacari mijiriani, Pueyasoori cuno pojori quejoonutaniya cutara, pueyaraaanu na saniitiosocoriquiano.

Saniniuuja, cante Pueyaso Sohanu tojjiani, Pueyaso panishano na miiniuria puetunujuanaa, nojuajaari pueyaracaanu rishijara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹Cunora pueyanaa, niaa jaara maninia miijiaca quiri, majaari maninia miiniuria nia taajenu. Pueyaraaanu maninia miijiaca nia quiri. Niaacuajaari niishiya, pueyano jaara na cuhuariquia natare, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohanu tojiniu tarinitiaa-quirini, paa cuara sashiirijuhuj. Na nuhuaji cutara paari jiyanohua shuquiriaatia quijiaca jiyatesaanutaniyani, maninia pa miiniuucua. ¹⁰Naacuajitij, jaara pa naata quiriquia, maninia pa miiriquia puetunu pueyanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatasaari na naajio

¹¹Nia niquiri cua naajio pueyanaa. Naa quera namijaaca cua naajiosacari niaacuaratej, nia niishiri janiyajanaari nio naajiya tama cua juaashiquiatajaani. ¹²Socua cua tojiri pueyanaa. Cuno pojori, nia shiniujuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniuucua. Majaari nojori tieunuu quiquiaa saaja Jesucristoo-cua, Pueyaso pueya nojori quiniuria. Cunora, nojoriiri jiyanohua paniya nia cararaatiuuquia co miatesano pueya nia quiniurajuhuj, taa puetunu Judiocuaca-

janaacuaani. ¹³Cuno pojori, canapuede na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniurajuhuj. Niaa jaara miatejosaare, nojoriiri tama timiquionutaniyajaaja, nojori tojtiajaca nia quiniuucua.

¹⁴Janiya saniniuuja, Pueyaso cuara cojuara janiya maja cua shuquiritianura tama cua miishanojuaja. Janiyari saaja pa Jiyaniija Jesucristo shuquiritianu paniquiaani, pocuara na cusonuucua niyacutesanojinia. Naacuajitij, janiyari mijiria niishishanoocua jiaatiaashijara jatanishaaquiaarini. Mijiria casaari maja na naata shiniujiuniu janiya, nocua cua jiaatianura socua. ¹⁵Pueyanaa, pa cararaatiuuquia co jaara miatesano quiri, naajaa. Naajuhuj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niqiuara cunora. Saaja panishano cutaraari, quiarinio pueyanora pa jatanishaanura Pueyaso Sohanu cumaacata. ¹⁶Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷Tariucuaajaari cua rootasano nio naajioneejinia. Quiarjiani, tamonu cuara socua cua taajeteyaquiiria sesa na niishitiojosanota nijaniya. Janiya cutaraari pa Jiyaniija Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸Cua panishano cuarta Pueyaso pueyanaa, nioojia cuara jiitiaara pa Jiyaniija Jesucristo cumaaca, na niishitiajanio. Cuaara naa quiriartej.